

四庫全書

集部

欽定四庫全書

宋元詩會卷八十五

兵部主事陳焯編

余闕

字廷心本唐古氏世居武威以父實喇藏布官合
肥遂為合肥人母尹氏夢異人至生闕墮地時
髮盡白其性澹無嗜欲不知肉味惟甘六藝學若
飴蜜與京兆張恒遊恒乃吳澄弟子善談文理闕
之學因以絕世擢元統癸酉進士第授同知泗州
事治聲大著俄召入應奉翰林文字轉中書刑部
主事與當路議不合拂衣竟歸復召拜監察御史
知無不言言多峭直無忌或勸之稍遜以避禍闕

弗答改中書禮部員外郎出為湖廣行省左右司
郎中時右丞實喇卜怙權自用會徭蠻反當帥師往
討未有行意闕揚言激之始行旋奉召還翰林待
制出僉浙東廉訪司事丁母憂歸隱青陽山中至
正壬辰天下兵動平章托和爾巴魯統戎淮南承
制起闕權淮西宣慰副使分治安慶安慶距城皆
盜柵也闕從間道入推赤心置人腹中民翕然歸
四方來依者甚衆闕知民可用乃帥之破雙港砦
聲威大振諸砦次第請降則益繕城浚濠修戰具
力屯政賊至輒敗却之是時淮西官陷惟安慶歸
然獨存轉淮西行省參知政事尋改左丞賜二品
服闕益奮勵誓死報國丁酉冬寇大集圍城樵餉
路絕兵出數失利戊戌正月七日城陷猶率眾巷
戰不勝遂自刎死年五十六其妻蔣氏聞之亦率
其子德臣女福童赴水死諸將卒從死者
千餘人事聞贈淮南行省平章諡曰忠宣

擬古 二首

昔在西京日縱觀
質前聞皇皇九衢裏
列第起朱門借問所居誰丞相
大將軍平明事遊謁車馬若雲屯
芍藥調羹鼎狔狄鑄酒樽
頌聲美東魯逸奏出西秦
迴風薄蘭氣十里揚清芬
東家有狂生容顏若中人
謬言擬宣尼幽思切玄文
著書空自苦名宦乃不振
悠悠千載下安有楊子雲

昊天轉時律大火西南馳
勁商發羣籟白露降嚴威攬

衣起視夜明月鑒薄帷翩翩征雁翔唧唧寒蛩悲紅蘭
委芳采柏葉亦離披喬喬千丈松孤生泰山隈凝霜裂
其膚層氷斷其柢摧殘若傾蓋蒼翠終不移草木有至
性明哲宜戒茲

白馬誰家子

白馬誰家子綠轡縵瑚纓腰間雙寶劍璀璨雪花明甫
出金華省還過五鳳城君王賜顏色七寶奉威聲夜入
瓊樓飲金罇滿繡楹燕姬陳屢舞楚女奏鳴箏慷慨顧

賓從英風四座生一朝富貴盡不如秋草榮黔婁雖貧
賤千載有餘名

天門山

保寧知府
楊丹作記

揚子博地志名山屢出王但言隱彌深崇冠峙嵩梁井
絡通遙甸天經列鉅障羣峰如菡萏歷亂發金塘玉壺
既嶮嶮天門迴開張蜿蜒連紫蓋飛泉濺石牀入門陰
脩竹中夏若寒霜靈鳥多異色中林皆妙香耀真啟幽
室積石構瑤房萬里秘冥與千秋阻秩望惟應學仙侶

結桂共相羊

送劉伯溫之江西廉使

祖帳依山館車蓋何繽紛使君驅駟馬衣上繡成文中
坐陳綺席羽觴流薄薰情多酒行急意促歌吹殷況我
鄉邦友同館復離羣初暘麗神皋遙望澄遠氛迴鏡望
雙闕五色若卿雲蒼茫歲年徂東西岐路分道長會日
遠何以奉殷勤惟有凌霜柏天寒可贈君

秋興亭

涉江登危榭引望二川流
雙城共臨水兩岸起飛樓
漢渚深初綠江皋迥易秋
金風揚素浪丹霞麗綵舟
登高及佳日能賦命良儔
御者奉旨酒庖人供膳羞
一為山水媚能令車騎留
為語同懷者倘遊即來遊

九日鄂渚登高

南州理秋祓嘉節協乾陽
爰與幕中友臨眺涉崇岡
維時天氣肅芬菊已沾霜
瑟瑟風振谷淒淒日在房
高雲歛楚岫曜景遊川梁
微徑出丹林列坐泛金觴
佳賓未

會合良會安可常英曹幸文雅獻酬寧計行預恐還吹
帽煩君戒太康

先天觀

仙客鍊金地蒼山深幾重至今龍虎氣猶在琵琶峯峯
前石路盤金澗垂楊嶺萬壑闕阿宮千秋奉丹鼎日日
采三秀人人吹玉笙既要王子晉復命董雙成方朔金
門步春來多自豫青鳥幾時還銜書寄君去北闕懷美
祿南山思遠遊勞心如御水東去復西流

題虞邵菴送別圖

南州山水麗中田歲事豐時貞文物粲道合朋輩同濟
濟衆君子班坐蔭青松迴洲環偃月丹林結綵虹翔鷗
方矯矯鳴雁亦噉噉即趣情已展染翰思彌工予亦幽
栖者纓冠朝北宮披圖誦佳詠邈爾想高風

送黃紹及第歸江西

上林花落盡東門餞別初遊絲橫輦道金波溢鏤渠含
觴不能飲躑躅此城隅念子正英妙丹泉媚綠渠翻然

阻山岫邈爾問離居芸閣誰同坐蒲編孰共書時應有
詞賦為寄北飛魚

送胥式南還

孟冬寒律應原野降繁霜客子倦遊覽結筇還故鄉驅
車出城闕旭日縣晶光綺宮上爛爛翠閣後蒼蒼豈無
京華志晞景發清揚富貴在榮遇貧賤有安行恒恐歲
年迫臯蘭凋紫芳君看沙上雁騫翮乃隨陽

題施氏西嶼書堂

中智貴得性得性非易求羨君潁川曲松竹蔽層丘春
秋當佳日兄弟各命儔總轡凌晨銜展席面清流參差
瓊峯出泓澄綺磧周緇荷承繡宇黃鳥響疏樓起坐玩
芳帙為樂鮮優游河陽恥巧宦建春壓旅愁安得周公
瑾為館孫仲謀

蘭亭

奉節過東鄙總轡臨越墟覽此崇山阿亭榭猶晉餘陽
林積珍木楔館流鏤渠微風旋輕瀨宛委寫成書秋杪

霜露滋清商滿縣隅紅蓮凋綺縠微瀾見躍魚藉芳泛
羽觴視聽良有娛逍遙大化內豈必三月初

自集賢嶺入大龍山

皖公標楚甸茲嶺孕奇形翠積樅江潁崇冠呂蒙城戒
途入中林平岡駐我旌延望失來術周覽多所經栽栽
石窻矗窻窻巖岫冥離離雲朝隤粲粲樹數榮關弓射
鳴雁羣谷振弦聲仰憐山人居俯悅洞下耕蒼龍啟春
侯金虎收光精權家既非學農用或可明願言同載者

為爾鑄阿兵

安慶郡庠後亭讌董僉事

鯨鯢起襄漢郡邑盡燒殘茲城獨完好使者一開顏省
風降文囿弭節遵曲干雙池夾行徑累榭在雲間天淨
羣峰出地迴蒼江環霞生射蛟臺雁沒逢龍山開樽華
堂上命酌頗危欄主人送瑤爵但云嘉會難豈為杯酒
歡樂此罷民安魄淵無恒彩清川有急瀾明晨起驂服
相望阻重關

送康上人往三城

嘗登大龍嶺橫梁視四方原野何蕭條白骨紛交橫維
昔休明日茲城冠荆揚芳郊列華屋文繡被五章乘車
衣螭繡貴擬金與張此禍誰所為念之五內傷豎儒謬
乘障永賴天降康樅陽將解甲皖口寢開疆耕夫緣南
畝士女各在桑念子中林士振策亦有行我聞三城美
龍嶺在其傍連林積脩阻下有澄湖光明當洗甲兵從
子臥石牀

七哀

殷湯誦案阻周魯歌東征聖哲則有然我何敢留行斬
牲祀怒特釁鼓起前旌野布魚麗陣山鳴鏡吹聲函關
何用塞受降行已成路逢故鄉人取書寄東京寄言東
京友勉樹千載名一身未足惜妻子非無情

八月十五日處州分司對月

玄武夕始正華月生秋旻金波何穆穆綠桂滿中輪徘徊
出西陸照耀此甌閩光流河宿隱氣隨商律振餘輝

動軒房紫闥含微津皇天降嘉歲五政亦已陳樂哉一
卮酒允矣同庶人

安南王留宴

將命坐藩服式禮奉國賓賢王重意氣延客列華裯肅
肅高堂上圓方饋八珍齊優雜趙女歌曲一何新遺響
從風發雕梁落素塵中觴每傳滿眷眷難具陳厚往已
有愧懷報恐無因

黃鶴樓

宮堯黃鵠嶺歸魏構楚材澄江環畫楯連城抗鉛階雕
衡朱鳥峙淵井綠荷開隱見長沙渚想望陽雲臺晴霄
一仰止輪奐信美哉淮南儻好道日夕化人來

龍丘長吟贈程子正

戰龍起新室羣鳥亦翩翩偉哉龍丘生抱琴歸故山仰
視天際鴻俯弄席上絃清音發疏越逸響遺澗泉悠悠
鳳翔漢婉婉虬媚川清風自千古何用能草玄

待制張廷美姑阿慶詩

葭莢啟望國灼灼詠桃夭操觚染芳藻短髮未勝翹始
聆白雪句兼傳黃竹謠蘭萌初映砌春霜已降霄秋榛
覆故隴驚蓬颯迴颺金罇與瑤席庶足奉嬌嬈

一作
仁嬌

詠古

楊沛

楊生仕州縣謀國不謀身一朝解印綬歸來但長貧茅
茨上穿漏頽垣翳綠榛空牀積風雨蝸牛止其中辛苦
豈足念殺身且成仁

大別山柏樹

奇樹如蛟蜃盤飀上虛空孤生雖異桂半死反如桐香
帶金爐氣色映綺錢中靈從后皇服年隨天地終常瞻
北枝翠終古鬱蔥蔥

送王闕赴泗州行捕提舉

蒼茫吳楚會縱橫淮汭流春水未泮渚芳杜已生洲楊
旌朱樓前張獵青山幽獻功效大兕亦致公子裘消搖
足為樂何嗟晚不侯

送李好古之南臺御史

都門相送處旭日動蘭暉綺樹鶯初下金溝絮漸飛分
驂向遠道把袂戀音徽去去江南陌應看滿路威

送霍維爾令尹

握手蘭宮外朝光滿禁塗山寒知塞近苑靜覺鶯疎草
草離樽既悠悠征輶驅還應軫時念不羨執金吾

呂公亭

鄂渚江漢會茲亭宅其幽我來窺石鏡兼得眺芳洲遠
岫雲中沒春江雨外流何如乘白鶴吹笛過南樓

宴晴江山拱北樓

漢坻開繡閣蕭然似渚宮晴江華楯外列岫綺錢中樹
色芳樽綠荷花粉臉紅賢王敬愛客樂宴意何終

詠絕塵軒

網軒開翠嶠山水下蔥蘢江中寶牀擁樹杪雕欄紅心
融二陣滅境靜六塵空應似青蓮葉齊開綠水中

壓雪軒

軒轅鑄鼎處仙臺成畫圖寒雲生洞渚暝色入蒼梧如

霧飄丹閣非烟起玉爐年年漫來此無處挽龍胡

竹嶼

秋水鏡臺隍孤州入淼茫地如方丈好山接會稽長紫
蔓林中合紅蓮葉底香何人酒船裏應是賀知章

送危應奉分院上京

峽路傳清警金輿夾綵旃還如向姑射詎比幸甘泉遠
樹紛成幄關榆始委錢從臣偏寵近載筆幔城邊

禎祥菊

舊花已萎絕新花迺再芳都緣稟金氣特解傲司藏
旖旎生殘馥葳蕤出故房應憐蕙草質戢穎委微霜

賦得九里松送吳元振之江浙左丞

結駟向青郊松陰九里遙言從天竺寺自度小春橋
偃蹇成芝蓋蕭森蔭蘭橈相送將何贈期君保後凋

題果羅羅易之四明山水圖

窻中望蒼翠春水起晨霏孤嶂纔盈尺長松未合圍
蕭蕭此仙客日日候巖扉念爾空延佇王孫且未歸

祝蕃遠經歷挽詩

逸軌無還轍驚川有怨思
蒼苔生舊館素簡委空帷
龔勝誰相弔虞翻少見知
惟應問道者寂寞薦江蘼

題蛾眉亭

空亭瞰牛渚高高凌紫氛
澄江萬里至華嶠兩眉分
落日兼霞彩流光成綺文
憑軒引蘭酌休憶謝將軍

南山贈隱者

君家南山下南山果何如
開闔盡雲路向背凌空虛
木

客採薜荔怨女詠蘼蕪何當牽白犬見君巖下書

賦得慈恩寺塔送李惟中赴西臺侍御

祇園開塔廟遐瞰盡三秦琬玉裁文陛金銅結綺輪高
標雙闕外流影灞陵津攬轡還登眺題名繼昔人

寄題環秀亭

在五祖寺

宗老來相報黃梅盜已平傳聞一峯下臨眺九江橫象
構誰能壞香臺積可成憑詢幾小劫又復到昆明

葛編修輓詩

景老

昔別情何樂今還語向誰幽房通貝闕空館骨蕪絲未
過徐公墓徒懷有道碑扁舟望湖曲清淚濕江蘿

賦得鉅野澤送宋顯夫僉事之南山

堤上柳沈沈春蒲汎渚禽濟田東滙濶汶水北流深落
日依中沚浮雲積太陰微茫看不盡渾似醉時心

夜坐和成太常

牽衣表宮雉華星動綺錢沈沈鵲觀悠悠清漏傳無
才愧三益虛食念百屢綿思至中旦莫繼瑤華篇

送張有恒赴安慶郡經歷

曉路通高嶂春城入大江
草生垂釣浦人語讀書窗
肅客移茶鼎行田載酒缸
幕僚誰得似高步絕紛龐

宋祭酒輓歌

文章知有數耆舊忽先零
東井開圖畫西山閱典靈
司徒虛執饋太史早垂銘
悵望平原繡時時問客星

送李伯實下第還江西

之子不得意南行無怨詞
官河人杳杳客路雨絲絲
古

木淮陰市春城孺子祠悽然千里別為賦小星詩

有所思

春風起寒色春衣方重薰新裝捲羅幕清唱入行雲艷
色若流月芳澤謝蘭芬嬋娟信無度我思何在君

長安陌

浩浩長安陌瓊樓夾廣廈鴛鴦御溝上芍藥吹樓前駿
馬追韓嫣金尊酌鄭虔功名有時有且得樂當年

伯九德興學詩

上德撫玄運顓俊尹神京三雍烝髦士五學訓齊氓登
高陳羽葆鸞刀奉麗牲優游樂清化大道嘉方行

送孫教授

皇情重聲教宵裝爾載馳邊城南徼外禮殿左江陞揖
讓陳椰器絃歌蔭薜帷全勝宜春郭花落閉門時

賦得君子泉送彭公權為黃州教授

君子沒已久遺井郡齋中本寓思人意兼全澤物功銀
牀駁故蘚玉甃薄寒桐幾日趨官舍橫經誦養蒙

賦得春雁送司執中江西憲幕

春風起蘋末旅雁尚回翔
乳鴨嬌同唳新蒲短可藏
應懷洞庭水非避塞垣霜
客路頻懷舊題書寄帝鄉

題段吉甫助教別墅圖

玉署挂新圖如君舊隱居
峰高託霞上葉變為秋初
遊客看常在溪聲聽却無
只此同登望豈必命柴車

送王其用隨州省親

都門楊柳萬絲垂城下行人
駟牡駢宮中近得三年謁

篋裏新裁五色衣
漢皋秋晚遊娼少
夢渚波寒獵火微
我有愁心似征雁
隨君日日向南飛

登太平寺次韻董憲副

蕭寺行春望下方
城中雲物變淒涼
野人籬落通溝口
賈客帆檣出漢陽
多難漸平堪對酒
一樽難盡更焚香
憑將使者陽春曲
消却征人鬢上霜

題改應奉山水圖

水如剡溪水山似沃洲
山想見鱸魚美扁舟常不還

題溪樓

溪水綠悠悠，高樓在溪上。
日暮望江南，舟中采菱唱。

別樊時中

二首

桃花灼灼柳絲柔，立馬看君發鄂州。
懊惱人生是離別，不如江漢共東流。

光祿橋西惜解攜，春星欲傍露盤低。
自來宮柳多離思，更着城烏在上啼。

題光祿主事仲桓君海棠圖

沈香羯鼓弄春杯
席上纔看半作堆
爭似岩家屏障裏
年年歲歲有花開

題紅梅翠竹圖

竹藥梅花一色春
盈盈翠鈿掩丹唇
休言畫史無情思
却勝宮中剪綵人

郭奎

字子章淮南人宋濂序其望雲集曰子章曾從余
廷心學治經而性尤嗜詩自黃初以降諸名家多
嚆疇其芳腴故別句鏤詞趣味雋永韻度婉微廷
心極稱之集名望雲者志思親也遭亂離悲憤以

老于詩外無
所表見云

擬古贈別

孟冬霜露降悴彼荷與蒲青青蕙蘭芳采之將焉如贈
君夙昔意聊以慰斯須絃歌厲清響置酒岐路隅親戚
念遠行各言勉良圖常恐不為樂日月方其除晨風奮
高翼北林多古榆臨岐執子手安得同車驅

九日偶成

良晨惜難再秋序倏已殫登高啟飛閣望遠俯層巒寒

菊正盈把濁醪方共歡微此一日宴客懷殊可歎

擬古思友

鵲鳴歲將晏蒹葭淒以霜思君隔山海道路悠且長睇
彼參與辰清夜悲未央狂飈西北至一雁方南翔言念
疇昔歡與子同衣裳安知異寒暑日月不我將天高則
有斗川涉愁無梁憂心隱如惄出戶徒彷徨

送姜彥英還錢塘

東南有高樓華月照綺楹瓊筵列海錯雜以絃歌聲疎

卷八十五
簾捲晨夕迴瞰蒼江清君今利攸往我獨懷鹿鳴執手
望長路駕言出東城嘉會常不足何況臨當行晴郊望
樹碧綠渚春蘭生持觴意難盡相思空復情

寄李彥端

嘉樹藹夏綠清風動虛襟念君有高趣勞我徑寸心佇
立東城曲日夕見雲岑以茲世多故忘彼升與沈聊樂
在書籍佩玉懷所欽華池散逸步當戶鳴幽禽蘭生已
覆井泉響迴出林醉將山口月彈作絃上音明月照別

鶴遺音憂南金何當坐松石從爾聽瑤琴

次錢子貢蘇門感懷

燕支木葉落盧龍秋色來空閨有思婦清夜悲且哀錦
書為君寄寶鏡誰人開膏沐不復容綠髮栖浮埃團團
皎月輝照彼單于臺馳心在萬里出戶聊徘徊

雜詩

孤月江上明清光泛流水北有愁思婦南有遊蕩子蕩
子行未歸思婦安所止姑老在高堂貧賤復如此君行

忽逾年膏沐誰為理妾心金石堅不逐浮雲起會合良
未期離亂何時已君當復來歸妾當效同死凌風願翺
翔揭波詠杭葦再逐平生歡被服紈與綺

紀夢

忽忽顏芳年搖搖寄行役寢興勞形神鬢髮玄已白驚
風響庭樹憂思日常積夢魂清夜歸髣髴舊鄉邑青松
在園田桑柘陰廬室飛鳥雲際還牛羊下來夕澄湖澹
微波秋山有佳色雞犬雜比鄰墟烟靄阡陌怡怡兄弟

情淒淒丘隴側伐木逢行歌僕夫候馬立臨流濯長纓
挂冠坐盤石似慰生平歡覺來異疇昔百年如轉蓬萬
物乃遺舄天命良在茲勿復云得失

貧女吟

猗猗石上蘭青青澤中蒲貧家有美女二八嬌如荼朱
顏不自媚貞固操匪渝少為父母惜生長紅羅襦綺樓
高且深竊恐行露濡一朝零落盡萍迹湖東隅塵沙陋
茅屋水濺冰雪膚鴛鴦懶復織翡翠愁還梳鳴鸞在何

處坐惜華芳徂恥作商人婦願奉君子儒妾心擬有託
請贈雙明珠

遊羅漢寺

步出城東門褰裳涉西澁幽尋窮四郊日入未遑已逍
遙遠塵蹤夕憩空門裏陰堦轉長廊金碧炫晴綺園池
滑且深水竹澹如洗追念疇昔歡豈謂重來此春日忽
載陽百物含芳卉好鳥向我鳴高僧見人起閒雲石上
生天花覆瑤几信宿方告還行行詎能止

春日行

春風爾來何無情忽然吹我華髮生淮南三月花滿城
金尊海錯羅雕楹美人對坐彈鳴箏酒酣起奏升天行
當年歡樂不復得白日為照心未平心未平發長嘯我
曹豈是閭閻兒齊東魯連頗同調

新豐市

過新豐待沽酒雪華當空大如手斷橋荒店無人烟獨
有寒梅伴疎柳憶昔江東未構兵我亦曾經此地行東

家槌牛出新釀西家開宴還吹笙春風步障千花錦當
壚美人勸客飲形勢雖非漢祖為髣髴咸陽舊陵寢停
驂慷慨懷馬周我欲濯髮臨清流斗酒不可得高興良難
酬着鞭遙指敬亭路孤雲日暮心悠悠

夜坐吟

江風蕭蕭吹古樹關月蒼茫海生霧北斗漸落明河傾
城頭烏啼天欲曙客子不寐憂無衣東征三年猶未歸
蟋蟀在戶歲將暮洞庭霜白芙蓉稀男兒生當百戰死

不執金吾即挾七閉門勿用長夜歌騏驥終能致千里

七夕曲

天河盈盈一水隔河東美人河西客耕雲織霧兩相望
一歲綢繆在今夕雙龍引車鵲作橋風迴桂渚秋葉飄
拋梭投杼整環佩金童玉女行相要兩情相合美如舊
復恐天雞催曉漏倚屏猶有斷腸言東方未明少停候
欲渡不渡河之湄君亦但恨生別離明年七夕還當期
不見人間死離別朱顏一去難再歸

從軍婦

從軍婦良家女新梳北髻學邊語狐皮裁帽紵絲衫馬
上佯羞見親故黃巾盜賊亂中華去歲燒我父母家天
朝命將專征伐強兵爭奪顏如花顏如花命如葉此身
一失無名節憶昔姑家納采時燈前豫綰同心結嫁夫
誓擬齊蛾眉誰知萬里為軍妻木棉帳低風日惡五紋
刺繡思深閨思深閨難再得人生莫願多顏色東鄰女
伴醜且貧鄉里不出成家室

寄衣曲

華燈閨室秋夜長
吳刀翦綵為衣裳
欲縫不縫心惻惻
還向姑前較寬窄
燕山八月雪苦寒
氈褐狐裘俱破裂
明朝驛使催征車
白袍絮就愁寫書
舅姑已老妻無子
願君早曳玉門裾
臨行封裹復致意
着時莫遣沙塵穢

和蔡都事見寄

汎汎仙槎遠雲津
月未沈水光明
使節星采動詞林
夙駕江亭迴前瞻
浦樹深瑤華如可
拾願得繼高吟

次劉仲孚

地遠孤雲白秋深一雁過
淚因明月下心在故鄉多
列郡方傳檄連城未息戈
羈危萬里思江上逐馳波

送孫良玉還同安

送君江上去山路雨初晴
落日平淮樹春潮帶皖城
酒因今夕醉人是故鄉情
莫說王孫怨芳洲綠草生

春日遊敬亭山

冠蓋聯鑣出晴郊北路分
我尋何水部誰似鮑參軍
芳

樹聞啼鳥飛泉隔亂雲題詩兼勸酒聊樂在殷勤

郡齋秋日次韻

幕府簡書靜一官清自閒秋聲在東壁爽氣滿西山叢
菊可延壽芳樽聊解顏當軒兩嘉樹好鳥暮知還

出暖水向新營

山陽暖水地舊是北軍屯一澗雲連棧千峰雪照門奉
書觀壁壘馳驛到邊藩為卜歸人信今朝喜鵲喧

留水西寺貽季潭上人

好山吾所慕今日水西遊花雨千峰暝松風六月秋龍
為人聽法僧共鹿尋幽如此林泉樂榮名安足求

秋興

龍門疏鑿禹時功江漢滔滔亦滙東萬古山河今異域
千年禮樂舊同風忽思鱸膾慙張翰將學丹砂就葛洪
祇恨兵戈猶在目秋來哀鬢對飛蓬

答人見寄

自傷孤雁影翩翩避弋南來折復旋塞上牧羊幾陷賊

山中尋鶴託遊仙黃冠偶倩傍人正寶劍誰為烈士捐
華髮秋來垂兩鬢江湖憔悴任吾年

早秋旅夕

初月涼風夜向闌倚樓愁到笛聲殘天高閭闔銀河白
露滴梧桐金井寒多病馬卿猶是客幾時張翰也辭官
年年怕近清秋日憶殺湖邊舊釣竿

涇縣

涇川不減若耶溪況有招提在水西四面雲山當縣合

五更星斗落簷低
挈舟競訪桓彝廟
立馬空慚李白題
但願功成身退早
桃花潭上結幽棲

臘日

臘日三年為異客
今年霜雪未全饒
風塵暗滿淮南路
霧雨寒生江上潮
鄉夢有時逢骨肉
此身何處託漁樵
共來吳楚交兵地
烽火依稀似六朝

次丘太守韻

翳翳桑榆晚正宜
夕陽山色望中奇
鷗盟遠渚誰爭席

鶴放長松自擇枝疏廣賜金忘得少陶潛束帶怨歸遲
黃花時節牽兒女爛醉籬根且賦詩

開歲臥病

多病文園渴未消自從人日遇花朝不知楊柳將春色
綠到淮南第幾橋

德興山中

路入深山忽有村隔溪烟火似桃源漁舟不喚行人渡
洞裏春寒靜掩門

書所見

黃犢飲溪芳草滿青裙挑菜碧片肥故山好處多如此
湖上春風憶我歸

劉汶

字魯源天歷至順間以能詩名好遊山水而探奇
會稽往來尤數郭奎嘗稱其所作故次諸望雲集

以見

贈劉禹玉

劉郎方朔徒遊戲紫泥海千年華表非唯有寸心在向

來逝河西雄辯吞虹蜺手携九節杖東入蓬萊栖我時
探禹穴同看山陰雪千人萬人中怪子獨超越朝騎白
鼻騮暮逐油壁車得錢即付酒攜妓顏如花踏翻豪俠
窟醉狎山人家或嘲狂處士或誚報恩子從渠立名多
詎識子奇偉一朝去鄉國北上爭吹噓家無十金產袖
有萬言書所陳果何事為國非自計寧遭丞相嗔肯負
丈夫志蹉跎十數秋甘與黃冠儔善藏倚天劍未暇摩
斗牛幡然走山東隱跡隨壺公還尋岱宗去絕壑凌天

風鷄鳴上日觀眼亂扶桑紅窺臨事未已逸氣橫萬里
行歌齊魯間興為廬山起廬山秀可餐怡此冰雪顏揮
毫灑瀑布五老開雲闕遠公拍手笑喜見遺民還乃知
士不偶正可遊名山去年臥衡岳聊憩四海脚厭垂君
平簾懶賣伯休藥却呼魏夫人共把流霞酌今年與山
辭下走湘水湄臨風弔賈傳酌月招湘纍文章本疏蕩
強忍終技癢光怪不可收倏忽又千丈有時遇知音朗
咏山中吟復恐兒輩覺不得容山林茲晨忽聚首慰我

別來久辛勤四十霜所獲竟何有却懷居東時勇以功名期焉知尚漂泊筋力供路歧舉杯置往念此去安所之南窺古雲陽更了山川奇山川固娛目慎勿過幽獨奈何白雲歌再送劉十六乾坤助蒼茫回首眷空谷我將秣其駒乃不受羈束願子無遐心歸哉返初服

汪主簿清明不出見寄

人情雨中花客情松上烟苟非薛卞門何以歸龍泉附驥知自遠慕羊徒得羶君看長舌人早晚無乾涎所以

汲太守穩作淮陽眠昨日出東郭風榆吹綠錢流光一
何情去我如郵傳道逢誰家子饌奠號新阡感此不能
已戍笳吹晚天


癸酉除夕

此夕何多感明朝過六旬乾坤又元統人物少咸淳酒
厭山杯綠楊傷水國春燈前曾戲綵馬首一沾巾

早春述懷

春與年年別窮隨日日增眼明貪夜讀事少忘晨興倦

鳥猶還木潛魚已涉水栖遲唯故轍無夢到飛騰



宋元詩會卷八十五

欽定四庫全書

集部
宋元詩會卷八十六

詳校官中書臣陸 湘

主事銜臣徐以坤覆勘

總校官知縣臣繆 琪

校對官中書臣田尹衡

謄錄監生臣金拱閭

欽定四庫全書

宋元詩會卷八十六

兵部主事陳焯編

成廷珪

字原常廣陵人元統至正間隱居不仕四方士之過淮東者必主其家所與遊多至尊顯以廷珪性甘隱退亦還無薦用之者生平讀書好古尤工於詩臨川危素序其居竹軒集云凌雲霞入霄漢糠粃萬物之興發乎至情非所有勉強而為之也同時詩人又有成禮執者曹學佺謂即廷珪別字因合其所作為一編焉

送李子威代祀嵩衡淮海

羣生望甘澤五岳雲氣通天香落岳谷瑞靄春冥濛海
潮天際來金碧森萬峰劃落紫翠堆亭亭玉芙蓉古廟
絲竹存迎神奏黃鍾空山遞餘響落花舞青童

春夜曲

芙蓉樓前拜新月寶鴨微薰透銀葉吳山楚水送遠遊
不管閨中照離別誰家玉鈎飛上天一似連環舊時缺
缺多圓少將奈何方寸愁腸萬里結為郎白苧裁春衣

又恐月圓郎未歸

戚戚行

戚戚復戚戚白頭殘兵向人泣短衣破綻露兩肘自說
行年今七十軍裝費盡無一錢舊歲官糧猶未得朝堂
羽書昨日下午帥府然燈點軍籍大男荷鍾北開河中男
買刀南討賊官中法令有程期笳鼓發行星火急阿婆
送子婦送夫行者觀之猶嘆息老身今夕當守城猶自
知更月中立

射鴨謠

阿儂手挽竹枝弓射鴨綠楊湖水東
三三五五似學武一箭誤中雙飛鴻
前船唱歌後船哭月黑湖中夜潛伏
東海健兒不敢過人命幾如儿上肉
老翁入縣前致詞夜夜全家猶野宿
丁寧門戶且勿開明朝又怕官軍來
聞中原河決盜起有感

中原九月黃河水平陸魚龍吹浪起
飛霜肅肅鴻雁來禾黍漂流桑棗死
大風怒號揚飛塵白晝剽掠如無人

官軍不誅海東賊縣吏乃殺西村民夜聞羽書起丁力
老稚嗷嗷向誰泣我當六十將奈何扶杖淮南望淮北
送天長教諭孫允誠任滿歸金陵

憶昔君方少年日文帝潛宮曾一識龍飛上天不可攀
圖畫空餘兩竒石閉戶讀書三十秋出門為官才領職
天長令尹莫我知苜蓿朝盤勝肉食三年官滿來揚州
僦屋正近橫江樓門前車馬日如市談經講易皆公侯
公侯滿座即沽酒典却篋內青氍裘鄉心苦憶長千里

明日君當渡烟水中山李桓文中雄乃是君之渭陽氏
深衣再拜如母存故宅重歸令客喜豈無舊業問松筠
亦有清輝照桑梓青雲熟路君何如白髮滄江吾老矣

丁千五歌

丁千五一百健兒如猛虎幾年橫行青海頭牛皮作衫
桑作弩射陽湖上水賊來白晝殺人何可數將軍宵遁
旌旗空倭甲蠻刀賊為主西村月黑妻哭夫東塢山深
母尋女屋廬燒盡將奈何往往移家入城府不是丁家

諸健兒仗劍誰能剪狐鼠樓頭醜酒齊唱歌爭剖賊心
歸釁鼓官中無文立賞功還向山東販鹽去

辛卯秋旱八月晦日天大雷雨

八月晦日雷怒號大雨如注風蕭騷捷如神鬼撼山岳
湧若江海翻波濤屋茅重捲一重去河水忽漲三尺高
驚鴻翅濕飛不起散亂中澤呼其曹雲龍有意洗兵甲
下與蒼生舒鬱陶浮雲收歛赤日見天宇廓遠無纖毫
歲年不逢亦偶爾吾將種麥耕東臯

雪舟歌為王子中賦

王郎不知何許人一舟橫在江之濱風清月霽未肯出
滄州獨與天為隣洞庭烟水兩寂寞十年不見君山春
北風三日雪大作挂席張帆以為樂手中鐵笛吹紫鳳
身上氅衣如白鶴拍浮滿載百壺酒企足蓬窻供獨酌
剡中隱者毋相疑乃與戴老同襟期更闌酒盡雪未止
趣櫂欲返猶遲遲今夕何夕此乘興千載未必無人知

悲徐州

彭城八月風塵起數郡義兵多戰死良家子女復何辜
盡作黃河水中鬼髑髏填海幾時歸千古沈冤無處洗
王師一日天上来賊船夜斫浮橋開守橋將軍不敢敵
狂瀾倒瀉聲如雷三山回望平如掌野曠猶聞金鼓響
軍中少年當封侯爭入轅門請功賞江邊老翁死即休
血淚沾襟空白頭

題畫史王夢麟卷

老翁窮居廣陵市四壁蕭然祇圖史題詩不博一文錢

古瓦磨穿空費紙不如鄉里諸妙年翰墨遊戲王公前
解衣盤礴作山水一幅寧惜千金捐何人最得滄洲趣
麟也于今稱獨步狂吟寄興肯相過畫我東橋竹居處
槎山歌為胡雲夫作

淮水源出桐栢山東流入海何時還胡君引水種秋秫
築室正在槎山間槎山清空白日靜胡君意與雲俱閒
漢東一夕風塵起雲亦高飛幾千里山間有家不得歸
却過揚州飲淮水飲之為洗冰雪腸今我不樂思故鄉

驅車明發度遠道廣海又在天一方思親恨不歸來早
夢中祇說槎山好他年歸隱奉親歡白頭同向槎山老
送周草窻尊師歸廬山太平宮

匡廬之山仙所居銀河倒蘸青芙蓉三十里路昔一往
十八社友今何如向來匡君結廬處至今海月縣高樹
水流花落春復春洞府蒼茫隔烟霧西風蕭蕭吹短衣
賣藥修琴不歸去潯陽潮落海欲枯幾時再得麻姑書
御風不跨林下虎回首肯顧盤中魚幸留神物守丹鼎

喜近弟子迎飈車世間信有揚州鶴看汝乘之上寥廓
晴窻須理白雪絃爽氣仍開紫霞閣袖中寶劍且藏鋒
彭蠡小龍方睡着

送郭仲安貢察院

捧檄上京華清才素共誇封章不起草健筆自生花燕
市千金馬天河八月槎看君冠獬豸好為觸姦邪

曉出錢塘門

出門聊適意草樹碧紛紛一雨破清曉四山生白雲僧

樓緣嶺出樵逕過橋分明日重攜酒來澆和靖墳

齋居

曉起坐終日無人扣竹扉柿因風落早菊為雨開
遲稚子能賒酒隣翁許借詩白頭無別計空負聖明時

登望江樓

長江不可極岸幘獨登臨潮信自朝暮山光無古今
碑亭流水涸輦路積苔深欲寫興亡恨西風萬葉吟

寄寅甫

山館殘花歇江樓暮雨餘長歌留客和短札倩人書露
葉縣青蔓風簾隱碧梧夫君隔河漢涼夜月生初

寄慈溪普天澤監縣

聞說慈溪縣官閒地更偏兩潮來海錯六月刈山田曉
塔天童寺春帆日本船何時瓊樹底花夕醉嬋娟

秋夜雜詠

平居在城市無夢傍江湖世事有今日生平猶故吾抽
書逢越絕引曲感吳趨隣叟邀皆醉歸來不用扶

賦林泉民

羣居傍城郭獨汝向林泉
亂世知誰在荒村只自憐
白雲棲晚樹流水界秋田
亦有催租吏敲門橫索錢

和謝雪波東阡道中作

淮楚紛紛際誰憐老逸民
一為吳郡客三見洞庭春
世路間關久侯門接納頻
麻衣猶似雪不敢浣緇塵

龐山湖泛舟過甯伯讓莊所

湖上足清晝雨餘生綠陰
扁舟到城近曲港入村深
野

叟頻相問郎君不可尋西庵肯分席吾亦老山林

寄愚隱智東堂

落日太湖上歸舟此磧沙百年同是客兩寺即為家殘
竹仍多筍枯藤也自花何時結茅屋相伴老烟霞

題慶雲東竹水居

水光當戶白竹色照衣青風露涵虛室江潮入淨瓶林
梢間挂錫月影靜翻經上觀何聞見秋聲出杳冥

秋日遊虎丘逢徑山元上人

攀葉樹層層茲遊記得曾到山疑是夢出寺忽逢僧短
簿荒祠酒生公舊塔燈留詩駭浮俗山鬼也多能

送李斯立

南國風塵滿西江道路難鄉人問家信津吏識儒冠短
髮何由黑孤心只自丹放歌聊縱酒努力且加餐

雪

閉門三日雪竹外轉蕭然夜色侵書幌春寒壓篆烟詩
題名彥後酒讓老夫先獨臥袁高士清風幾百年

夜過吳江聖壽寺宿復中行方丈

深夜扣禪扃天寒月在庭鳥驚栖後樹僧掩讀殘經蔓
草風吹白枇杷雪洗青對牀聽說法方寸愈惺惺

登靈巖山

木杪見浮圖盤盤一徑迂倚巖留客坐過嶺倩人扶野
色平如削湖光淡若無殘碑不可讀春草沒龜趺

送澄上人遊浙東

浙水東邊寺禪房處處家千崖無虎豹二月已鶯花曉

飯天童筍春泉雪竇茶煩詢夢堂叟面壁幾年華

憶遊龍井過南天竺登二老亭曾賦一詩

二老題詩處風流不再逢客歸黃葉雨僧住白蓮峰誰
謂山無鳳人傳井有龍白頭江海上今夕寄行蹤

三月二十五日過上洋徐居士柯莊

趣潮深入港風急水西流沙潤輕沾屐橋低欲碍舟孤
花餘晚艷芳草亂春愁鷗鷺應相笑衰年尚遠遊

吳中五日追念故友李時中李欽嗣有感而作

夢繞南岡北嶺雲一杯無計灑松筠世間我豈長貧者
地下君為不死人夜雨自荒張祐宅秋風誰障庾公塵
于今道友俱凋喪落日江湖淚滿巾

八月十六日送張仲舉至秦郵驛是夕邵文卿置

酒雲峰臺望月

水驛官船晚未開月明乘興且登臺揚州鶴怨山人去
甌社珠迎國士來千里何時重命駕百年今夕此銜杯
同君盡醉交遊地為問秦郎安在哉

送陳景川歸盱眙

第一山中風物殊我欲買田來卜居
風林把酒聽黃鳥
雪港挂罾分白魚
富貴不求吾老矣
漁樵有約子何如
可能久作終焉計
北海方修薦鶚書

虎溪三笑圖

三老風流笑口開
山中猿鶴亦驚猜
攢眉入社謾多事
送客過溪能幾迴
僧影欲隨秋水去
虎聲偏傍石橋來
東林絕響今千載
撫卷題詩愧乏才

寄巴克實尚書

憶陪冠蓋集通津下士無由拜後塵
曾和淮南招隱曲得從天上謫仙人
鵷鸞在列誰堪並鴻鵠高飛不可馴
遙想退朝香滿袖題詩還記竹軒春

寄烏克遜幹卿參議

紫宸奏對出班行畫省論思晝漏長
三月不知燒筍味一春還憶煮茶香
幾人白髮黃花酒何處青山綠野堂
扶植皇綱在今日中原草木仰輝光

夜思

斗帳方牀一布衾，睡餘推枕復長吟。
青燈細雨三更夢，白首殘編萬古心。
天上不知何歲月，城中誰信有山林。
哀歌坐待東方白，短髮刁騷不滿簪。

環碧齋

面面溪光護石苔，軒墀無復有塵埃。
月涵虛白浮秋去，水泛空青入座來。
漁釣兒孫多質朴，嘯歌鷗鷺不驚猜。
我家亦住滄江曲，千箇簷簷繞舍栽。

蕭萬戶野鶴卷子

肯著邊塵浣綽衣當時城郭是耶非
自離碧海三山去直過青城萬里飛
老去揚州空逸興何人沙苑脫危機
丈夫功在麒麟閣莫說仙家有令威

送謝芝甫赴山南憲

謝庭子弟多佳士荆國山川總勝遊
萬里捧書催入幕一朝撾鼓發行舟
玄猿啼處巴江夜白雁來時楚甸秋
襄漢風流千古意為君長憶仲宣樓

東勾曲外史張伯雨

霞珮翩翩出洞天當時彷彿見癯仙幾年南國張公子
今日西湖葛稚川滄海塵飛丹幾熟玉堂人去榻空縣
林間載酒來相覓乞寫山經與世傳

送幹克莊僉憲調淮西道

繡斧煌煌擁使輅才名籍籍在中朝甘泉詞客河東賦
蓬島仙人海上樵風振紫山迎驛騎雲開金斗見秋鵬
澄清事業須公等桂樹淮南未易招

廣陵岳宮醮夜觀王澹洲高士歲事自登瀛橋迎
師入黃籙壇

濛濛雲氣濕霓旌小隊紅綃鳳蠟明鸞鶴舞隨行道影
魚龍出聽步虛聲淮南高士青毛節勾曲仙人碧玉笙
一路天風吹不斷此身今夕在蓬瀛

送楊士先歸長安

落魄麻衣不受塵黃金釋盡只清貧新豐市上酒濯足
韋曲城南花惱人豪傑謾嗤秦逐客漁樵能話漢功臣

清時未老丹心在姑把長竿釣渭濱

阮子華所藏桃源圖

桃花流水似天台彷彿三生到此來
玉杵玄霜無處覓金堂祕室為誰開
滄州一夜生芳草陰洞千年長綠苔
何必誑人秦甲子漁郎祇見兩三迴

嶽宮登瀛橋

疊石為橋跨兩涯只如平地入烟霞
銀河夜擲仙人杖碧海秋橫奉使槎
浴水先迎三島日隔闌遙見十洲花

月中時有簫聲過多是山頭聖母家

題山居圖

石子坡頭松兩株水光嵐氣護幽居
山翁被酒愛騎馬溪友放船來捕魚
秋色自隨黃葉老野懷常共白雲舒
何時卜築如圖畫竹下開軒更讀書

瑞雪為劉芝田賦

風捲寒溪漾碧沙曉林驚見玉橫斜
人間風日不到處天上神仙種花九
地暖迴龍有穴三山雲靜鶴無家

泛舟來覓芝田叟留作山陰勝事誇

寄謝方方壺寫寄遙山古木

鬼谷陰陰苔蘚班只除猿鶴伴高閒
丹光或在藤蘿外劍氣常留水竹間
每讀內篇消永日還將生紙寫遙山
哀翁可是非仙骨不得相從共往還

送孫從義憲史貢部

貢名書到拆封開正爾諸曹議選才
侍史閭中簾影動尚書天上履聲來
階墀伏謁人皆喜符牒鋪張手自裁

不有雄聲驚畫省可無清論達烏臺

送余廷心翰林應奉

楓葉蕭蕭江已秋吳船三日住揚州
靛花深染青綾被雲葉新裁紫綺裘
征驛馬嘶風滿樹別筵人散月當樓
明年春雁將書去人在蓬瀛第幾洲

畫魚

生平蹤跡侶魚蝦浦月山風滿客槎
曾向春盤登北鮓更從丙穴薦南嘉
賞花釣得留詩友折柳穿來覓酒家

萬里江湖清夢遠，予今空對畫中誇。

送李唐臣調山南憲幕

潮落寒汀水欲冰，酌君何惜酒如澠。
人憐狗監知司馬，我喜龍門識李膺。
興氣九秋橫楚澤，先聲一日到江陵。
君行自勵青雲志，赤鷄終慙九萬鵬。

夜泊青蒲村

黃葉飄飄秋滿天，數家茅屋更翛然。
村中老人不識字，溪上小兒能駕船。
薺菜登盤甘似蜜，蘆花紉被暖如綿。

此中長得無宵警
春雨扶犁學種田

春日遊上方寺因過別業

今日雨晴山亦佳
散行聊復寫幽懷
田翁入郭買春酒
野衲下堂留午齋
老去任添新白髮
平生能著幾青鞋
醉中天地為衾枕
却笑劉伶死便埋

次李希顏述懷韻

八月邊聲草木寒
愁來短髮不勝冠
諸公莫謂王夷甫
我輩終慙管幼安
酒券如山空好客
田毛何日再輸官

蘭陵溝上松無恙還有孤猿夜夜看

登狼山醉題僧壁

白狼山頭僧卓庵我躡飛屐窮幽探麻姑又見海深淺
女媧不補天東南危枝如龍固矯矯怪石似虎猶眈眈
興來捉筆寫狂語此身只合棲雲龕

題朱伯禮西村草堂

愛汝西村之草堂
蠶塵不到堂中央
夕陽欲下山更好
大火未流宵已涼
隻屨也能來戶外
小舟剛遣繫籬傍

豈無百榼揚州酒與子同醉歌滄浪

寄崔宗文

白髮無家七十翁
筇杖漫指任西東
不因避地來吳下
正愛看山入剡中
臺閣故人書信少
江湖狂客酒船空
老懷無限平生意
清話何時一夕同

寄蔡彥文掾史

鳳凰池上神仙吏
却是中郎幾葉孫
幕下豈無奇計出
牀頭猶有異書存
防秋列寨山如戟
蒸土為城鐵作門

何限民間可憂事老懷那得與君論

送陳性之崑山從事

只將從事寫前銜省檄風來自折緘六案更須勞綵筆
一官猶未換青衫風生海市朝持酒日落江城暮却驂
我未識君空悵望恍如烟水隔仙凡

重遊虎丘寺

海湧峯頭行徑微芒鞋欲趂孤雲飛風高木客作人語
月出天王騎虎歸傑閣重樓遙隱見寒泉古木相因依

荒丘王氣豈消歇，千將莫耶千載稀。

題何德深溪南小隱

宰相官之不受招，碧梧林巷自逍遙。
溪頭二月花先發，洞裏千年雪未消。
朝士過門時載酒，仙人飛佩夜吹簫。
社圖誰寫耆英會，還肯中間著老樵。

寒食日松江有懷廣陵

老來偏欲惜年華，春正濃時不在家。
江上苦遭寒食雨，夢中猶見廣陵花。
書藏舊篋應無恙，酒憶新樓不用賒。

日暮荒城聞鬼泣東風吹浪滿天涯

送秀巖上人歸日本

廿年中國遊方遍看水看山念念非
海眼枯時千劫壞日頭翻處一僧歸
黃梅雨打袈裟濕白蜃雲隨錫杖飛
富士巖前留語在庭松西長舊禪扉

同張仲舉夜宿寒橋

柔櫓聲乾破寂寥青山磯下宿寒橋
乾坤萬事雙蓬鬢風雨孤舟半夜潮
丹鳳不來秋已老玉人何處水空遙

幾時重醉秦淮酒細聽漁樵話六朝

李子英心遠亭

門外黃塵掃不開何由吹得到靈臺閒看倦鳥投林去
靜愛孤雲出岫來彭澤高人多逸興栽眉仙客有天才
祇今誰到悠然處同采秋香共一杯

送袁李文赴帥幕

少年書劍學從軍幕府于今氣不羣白髮元戎多好武
青衫從事最能文帳前草檄花如雨江上維舟水似雲

把酒高歌成遠別不知何處又逢君

南城暮春

南城雨盡午風和二客相從步得過流水陂塘春事減
落花門巷晚愁多銀瓶自瀉沙頭酒寶瑟誰調陌上歌
莫寫江南斷腸句賀郎憔悴髮空皤

周平叔夜宿崇明寺海雲樓偕羅成之隱君文長
老盧隱君以沙頭雙瓶為韻

天台老衲兩眉龐自起高樓枕石扛煮茗別開留客處

論文多近坐禪窻冥鴻散去猶相逐獨鶴飛來不作雙
明發仙舟上霄漢定傳詩話滿滄江

丘克莊敬雲樓

君家樓外雲如海五色輪囷掃不開每就月明簷下宿
更隨秋色座中來瓊臺夜鶴迷蹤跡玉女春衣費剪裁
看爾騎鯨朝帝所舉頭西北是蓬萊

題玉巖溪山野趣圖

流水淙淙石路迂滿庭雲氣欲模糊白鷗溪上秋多少

黃葉山中徑有無十月雨深漁屋破三江風急野航孤
年來難覓幽居處空向晴窗看畫圖

送馬令尹任滿

長洲赤子窮無告正賴郎官為撫摩兵後人家猶未耜
日長官社有絃歌越來溪上波聲小魯望祠前月色多
自古長才須大用薦書元不待常何

送羅成之移居崇明其子季通亦之本州教官

先生八月乘烟霧妻子同隨海上槎太守賓筵先肅客

廣文官舍即為家波濤浩蕩藏陰火島嶼微茫接太霞
聞說三洲多藥草可能無意到丹砂

寄靜逸處士顧仲庸

環堵蕭然一室寬只除詩酒寄清歡瓶中有粟分寒士
袖裏無書上達官楊子暮年空識字龐公早歲已遺安
先生獨臥風塵表吾欲相從接羽翰

欲卜居海上未有定止先作寄紫步劉子彬

滿目風塵祇自憐輕裝已辦有行纏也知避亂依城郭

更欲移家傍渚田紫步于今無士馬滄溟何處有神仙
桃源只在人間世還許漁郎放釣船

送傅德潤陪將作同知武昌買馬回京

維揚館裏送軺車却算分攜八載餘天使出求沙苑馬
星郎厭食武昌魚數鞭已報充華厰上冢無忘過舊廬
老我平生無駿骨應從郭隗借吹噓

送盛克明辟掾浙東移家吳興

十年三送滄江別此日分攜又不同辟掾遠趨青瑣闥

移家喜近水晶宮
勿論後會知何地
且念離羣獨老翁
幕府郎官應問訊
為言憔悴坐詩窮

寄靈禪師四十年前在天寧方丈曾有求賦毛女
者

短杖輕包歸去來
水雲多處少塵埃
一春海鳥依簷宿
五月溪蓮繞舍開
雲外送僧歸日本
月中携客過天台
衰翁不得瞻圓相
猶望新詩託雁回

送清淮叟上人遊五臺

雁門西畔是靈山，山作青螺五髻鬟。
春日花開殘雪裏，僧房人在白雲間。
善財參問何時遍，文暢嬉遊幾日還。
淮海清公更瀟灑，早將聞見動禪關。

和李克約東皋雜興

二首

一春開遍雨中花，幾向東園管物華。
老去始知身是客，愁來空擬醉為家。
江樓簾箔霏香霧，野寨旌旗絢采霞。
曳杖歸來還自笑，夕陽原上數殘鴉。

芍藥花開江雨晴，幾時重作看花行。
松間攜妓從教俗，

竹下留賓也自清一夜春愁無處著三分月色為誰明
貧家亦有琴堪典好把平生意氣傾

甲午除夜有懷孟景章

夜窻兒女笑燈前亂世安居又一年鄰甕且分婪尾酒
客囊從換折腰錢凍消屋角貧簫雪寒壓爐頭楮拙烟
安得重陪孟東海劇談終夜不成眠

六月書所見

干戈滿地起風塵民物凋零府藏貧黃犢烏犍烹作食

雕梁畫柱折為薪江淮經理須賢俊草澤誅求到隱淪
謾道寬心應是酒老夫三日未沾唇

九月十日自壽

余生堪嘆復堪憐喜際明時老市廛把菊已從前一日
種桃猶待後千年但令有子親書帙莫怪無人送酒錢
寡欲清心今得矣煉丹何用學神仙

時寇未平感時傷事寄張仲舉

邊報紛紛日轉頻彭城猶未息風塵中原白骨多新鬼

浮世黃金少故人阮籍一生惟縱酒
季鷹今日定思莠
河東鶴叟應相憶落日悲笳淚滿巾

宿鶴沙張氏草堂

草堂借我作行窩杖屨頻煩太史過
滿地白雲清晝永
隔溪黃鳥綠陰多銀瓶自瀉山中酒
鐵笛誰翻小海歌
今日逢君須盡醉西家亭館奈愁何

寄周平叔先生就求蒼耳子

周侯久不通書問夜夜滄江入夢頻
五月採來蒼耳子

幾時分送白頭人
沙頭酒熟田毛足
港口船過海錯新
南北相望千百里
老來幽獨倍傷神

送智隱住水月禪寺

放船直到栖禪處
萬頃湖心一鏡開
綠樹鳥驚風落果
碧潭龍去水生苔
西巖尊宿傳燈在
東海高僧拄錫來
今夜月明清似水
大空無地着纖埃

王御史繡榮堂

色絲不染胭脂井
銀漢繅成五色紋
織女機中翻海水

諫官衣上繡春雲清嚴地位人誰到錯落天章手自分
他日錦歸當白晝江花江草亦欣欣

澹香亭

幽芳不自媚白日淨依依風露已如此山中人未歸

徽廟御畫梔子白頭翁

梔子紅時人正愁故宮衰草不勝秋西風吹落青城月
啼得山禽也白頭

唐明皇吹簫圖

寢殿春深晝漏遲
榻前侍女立多時
玉簫自按霓裳曲
賜與梨園弟子吹

納延

字易之官翰林

有前岡詩集

送邵元道

四首

仲連匡世才揮手却秦軍
掩袂停白日登車抗浮雲
射書誠草草孤城死生分
辭榮敦薄俗矯矯離其羣

虞卿舌轉九揣事洞微
茫事危見交態窮愁名益彰
黃

金散逝水白壁凝飛霜丈夫有定志得失非預防

梅生一尉微喋喋正天紀洗心洞玄化削跡無妻子龍
變誰為馴蟬蛻乃真止松迴風泠泠水落石齒齒

襄陽孟浩然拂衣歸故山放浪巖壑深流咏遺人間舉
袖林花落擊楫江鷗還羊公何墮淚水聲日潺潺

次韻元復初春思

三首

叢薄回青陽羈禽競新哢喧喧人語浮稍稍春事動澄
心待芳華小睡足幽夢夢覺天宇新朝光破簷凍

游塵逐平泉秀色翳榛莽彤雲互東西飛雲仍變雨昭
蘇在玄功步屨復延佇何當上青冥振翮窮委羽
遠客芳草思湛湛天外舟坐令覩知濶低徊此淹留古
樹擢奇石清流匯芳洲素心諒有在胡不為茲遊

李老谷

高秋遠行邁入谷雲氣暝稍稍微雨來漸怯衣裳冷紫
紆青崦窄香篠烟林迴峰迴復開豁夕陽散微影霜葉
落清澗寒花媚秋嶺途窮見土屋人烟帶虛井平生愛

山癖竭來愜幽靜月落聞子規懷歸心耿耿

新月行

江南小兒不識愁新月指作白玉鉤家人見月更歡喜
捲簾喚我登高樓三年留滯京華裏袞袞黃塵馬頭起
一番見月一番愁歸心夜逐東流水在家不厭賤與貧
出門滿眼多故人誰念天涯遠遊客只有新月仍相親
子有山水圖留倪仲愷太史所久未得題一日危
太樸謂予曰昔人曾以酒解醒子曷作詩趣之

亦此意也爰成是章

野人築室青山底綠篠娟娟映秋水天涯作客想江南
乞君題詩畫圖裏畫圖疊嶂雲鈎聯汀花碧草春依然
對此令人動歸興却思把釣清溪邊一束殘書挂牛角
大笑青天看日落窻下孤燈夜雨聲人間萬事秋雲薄
明年我亦去山陰君歸泛雪須相尋草堂下榻看圖畫
為君醜酒聽君琴

賣鹽婦

又有新鄉媪一首
與此詩同意刪之

賣鹽婦百結青裙走風雨
雨花灑鹽鹽作滴背負空筐
淚如縷三日破鎗無粟煮老姑
饑寒更愁苦道旁行人
因問之拭淚吞聲為君語
妾身家本住山東夫家名在
兵籍中倚戈崎嶇戍吳越
妾亦萬里來相從年來海上
風塵起樓船百戰秋濤裏
良人賈勇身先死白骨誰知
填海水前年大兒征徐州
徐州未復軍尚留去年小兒
攻高郵可憐血作淮河流
中原封裝音信絕官倉不開
口糧缺空營木落烟火稀
夜雨殘燈泣嗚咽東隣西舍

夫不歸今年嫁作商人妻
繡羅裁衣春日低
落花飛絮娛深閨
妾心如水甘貧賤
辛苦賣鹽終不怨
得錢糴米供老姑
泉下無慚見夫面
君不見繡衣使者
淞河東采詩想欲
觀民風莫棄吾儂
賣鹽婦歸朝試奏
明光宮

二真廟詩

東陽杜氏二女子
早喪父母鬻餅市
中厨人挑之二女
憤殺厨人走匿仙
居之孟溪夜雨水
漲皆溺死其屍閣
巨木上蒼藤纏束
若殯宮然乃隋大
業間也唐

仙居宰令狐某封其遺骨為塑像建廟溪上自爾水
旱之禱輒有奇徵宋令陳襄碑之今使君東陽陳君
元祥督漕入京上其事於中書命太常議封貞惠貞
淑二真仙詩以紀之

君不見瀟湘江上斑斑竹雨灑疎林淚痕綠又不見金
谿縣裏兩嬋娟身化白金金賤復

考金谿邑志未載
此事且字句疑謬至

今九疑山下大江西窅窕祠堂依古木仙居更有杜貞
娥千古清風凜相續貞娥鬻餅東陽市厨人相挑憤切

齒提刀夜斷賊奴頭
勇烈真同丈夫子
脫身竄匿來孟溪
木食澗飲幽崖棲
煢煢姊妹自相保
天寒愁聽哀猿啼
夜雨奔流溢山趾
月黑溪深黯無底
嗚呼雙娥同溺死
玉骨滕纏高樹裏
開元賢令銜餘哀
築祠却傍蒼崖開
悲風蕭蕭落山葉
精靈日暮猶歸來
陳侯自是古靈後
來宰仙居事非偶
瓣香赤脚禱龍湫
秋沛甘霖起枯朽
去年飛章徹九門
紫綾裁詔褒貞魂
鸞車孔蓋蔽白日
髣髴趨謝朝家恩
男兒堂堂軀七尺
忍垢含羞污簡

冊何如貞惠貞淑兩真仙雙坐神皋長廟食

行路難

至正己丑夏右相多爾濟拜國王就國遼東左相賀公亦左遷感而有作

行路難難行路黃榆蕭蕭白楊暮槍竿嶺上積雪高龍
門峽裏秋濤怒斑斑虎豹當天關蒼崖壁立登天難千
車朝從赤日發萬馬夜向西風還鑑湖海船苦不早遼
東白鶴歸華表夜雨空堦碧草深落花滿院行人少世
情翻覆如秋雲誓天軟血徒紛紛洛陽爭迎蘇季子淮
陰誰識韓將軍行路難難行路白頭總被功名誤高樓

昨宵歌舞人丹旆曉出東門去子午谷終南山青松茅
屋相對閒拂衣高歌上絕頂請看人間行路難

送楊待制出守閬州兼寄家兄

簪筆三年侍禁林分符還向蜀江潯暮雲盡處峨眉出
春雪消時灌口深鈴閣雕盤香冉冉臺門畫戟畫森森
錦屏山下多遺蹟好覓城南老杜吟

會稽代祀歸

白頭萬里喜來歸小院深深過客稀睡起無題閒錦囊

春來多病怯羅衣
流鶯亂蹴殘紅溜
乳燕連穿散絮飛
莫道山房渾寂寞
臥聽小女學鳴機

春日次王元章韻

翠幃金車錦駱駝
芙蓉繡褥載雙娥
雨晴輦路塵沙少
風起春城柳絮多
秉燭且留清夜飲
倚闌猶聽隔牆歌
山翁此日心如水
夢斷江南雨一蓑

次韻段吉甫助教春日懷江南

花底開樽待月圓
羅衫半裊酒痕鮮
一年湖上春如夢

二月江南水似天
修禊每懷王逸少
聽歌却憶李龜年
卜隣擬住吳山下
楊柳橋邊艤畫船

宋元詩會卷八十六